

Comision lo traha cu empleadonan riba fundacion cu tur museonan bou di dje

ORANJESTAD - Diaranson Minister Otmar Oduber a reuni cu trahadonan di Museo Arkeologico Aruba pa asina aki presenta e plan cu su ministerio tin pa loke ta museonan na Aruba bou un fundacion.

El a agrega cu posiblemente no lo mira e consecucionan di esaki di biah, pero a lo largo e lo significa hopi pa nos. Esaki ta e prome conversacion cu e empleadonan y lo kier wak cu den e proximo 3 pa 6 luna e lo por wordo concretisa.

Esey ta significa cu lo bay forma un comision cu lo traha cu involucramento di empleadonan tambe pa por logra e meta di forma e fundacion cu tur e museonan bou di dje. Loke e mandatario a indica na final ta cu el a compromete su mes cu tur e empleadonan di museo lo bay over y cu nan no lo bay atras den nan posicion cu nan ta na e momentonan aki.

Maneho

Actualmente tin dos museo na nos isla, Museo Historico y Museo Arkeologico, pero



na caminda tin 3 museo mas cu Gobierno ta sostene den cuadro di diversificacion cu tin y oferta cu mester tin pa nos turismo, al igual cu crea oportunidadnan pa desaroya San Nicolas como nos di dos capital turistico enfoca riba tereno cultural y historico.

E mandatario a duna di conoce cu Gobierno tin un maneho poni pa dilanti pa cultura y despues di e Cumbre Nacional di Cultura cu a tuma luga aña pasa a hiba diferente conversacionnan

unda cu a planta e vision nobo pa loke ta museonan na Aruba.

Minister Oduber a sigui splica cu a conversa cu e Fundacion existente cu ta esun di Museo Historico pa convirte den un 'overkoepelend orgaan' y a haya oido pa cu esaki y e ta tumando luga. Den siman venidero notario lo mester pasa e acta cu e cambionan, specialmente e cambionan cu ta acapara e vision nobo di tin tur e museonan bou di un dak.

Reduccion di gastonan

E cambio aki ta trece diferente beneficiario cune, manera ta reduccion di gastonan ya cu cierto funcionnan lo ta centralisa manera ta mantenimiento, mercadeo y publicidad, mientras cu cada museo lo keda tambe cu nan maneho individual, cu nan mesun conservator bou di un curador y un bestuur di 7 persona.

E mandatario a conta cu e reunion cu e empleadonan di Museo Arkeologico, of den e caso aki Departamento Arkeologico a bay hopi bon unda cu a presenta e plannan, e estructura cu e fundacion lo ta hinca den otro, kico ta e garantianan cu lo tin pa e empleadonan.

"Mi tin cu bisa cu e tabata un reunion hopi habri. Ya caba

hopi aña pasa a wordo bisa cu un dia e lo tin cu bira un stichting, esey tabata e condicionnan tambe pa Union Europeo e tempo aya por a hinca e cantidad di miyonnan cu a wordo hinca den Museo Arkeologico", Minister Oduber a duna di conoce.

E mandatario a laga sa cu el a dura demasiado pa e departamento wordo converti den un stichting, y awor aki den cuadro di e vision nobo nan ta mira cu e ta fit perfectamente pa por cay bou un estructura asina.

Intencion na final ta pa crea entrananan adicional, pa ta mas independiente, pa por conserva, preserva y tambe duna mas atencion na e parti di arkeologia y investigacion y asina prepara mas material pa futuro, Minister Oduber a declara. □